

याकूबकी टिवु यिकी

दी थेपकी कोर्ला

दी यिकी ति जम्बुलिङला कनिवा साङ टम्नी देतुप ख्रीष्टियानतिवाला याकूबकी टिवु यिन। दी यिकीला ख्रीष्टियानकी लाका ताङ किताङ नालुला गोवु रिक्पा ताङ गोमा कितुपतिवी थोक्ला टोङ्गुतिवा बिन वे। दी टोङ्गुतिवा तेरुप पेला याकूबकी नम्बा नम्बाकी पेटिवा शेन वे। ती पेटिवा ति नोर टोङ्बा, पेराङ्बु, खोक्पा ल्हाप, मीला ल्यामु कितुप, किताङ नालु, ख्ये बेतुप, तेपा ताङ लाकातिवा, ख डेकला ज्योकुप, रिक्पा, थमु ग्यकुप, अम्बारङ्गिङ कितुप, मारे तोङ्गुप, यम्बाला ड्यिर्मु कितुप, डराङ यिन सिरुप, हम क्या देतुप ताङ मोपोर कितुपकी कोर्ला यिन।

याकूबकी दी यिकीला ख्रीष्टियानतिवी तेपा ताङ मुला राङ लाका साङ ल्यामु क्यानी कि गोक्री सिरुप कोर्ला टिनी वे।

मुला राङ वोतुप लोप्च्येनतिवा

- यिकीकी कोर्ला १:१
- तेपा ताङ रिक्पा १:२-८
- पेराङ्बु ताङ टोङ्बा १:९-११
- खोक्पा ल्हाप कोर्ला १:१२-१८
- ड्येन्दुप ताङ कितुप १:१९-२७
- ख्ये बेतुपकी तेन्दोकला २:१-१३
- तेपा ताङ लाकातिवा २:१४-२६
- ख्रीष्टियानतिवी ख डेकला देतुप कोर्ला ३:१-१८
- ख्रीष्टियान ताङ जम्बुलिङ ४:१-५:६
- तिङ्मी टोङ्गुतिवा ५:७-२०

१ टसी देलेक! कोन्छ्योक ताड चोवो येशू ख्रीष्टला शब्ज्यी बुलुप ड याकूबकी छ्योक नेमा जम्बुलिङकी दासा दासाला टम्नी देतुप कोन्छ्योकला तेपा कितुप मीतिवा तेरीला दी यिकी ति टिवु यिनो।

खोकपा ल्हापला ख्येलुप पेला हम क्या देतुप कोर्ला

२डे ड्रियङ्ज्येवु अच्युनुपतिवा, ख्यिरा मिजीला छेटाड ताड दुङलतिवा ख्येलनी वासिन ती पेला ख्यिराड छासे क्यानी गा किसान। ३च्यिलासिसिन येशूला तेपा क्यावु तप्की खोकपा ल्हापला ख्येलुप पेला ख्यिराड मड मड हम क्या दे थुपुप डिवी सिरुप ति ख्यिराडला छ्या वे। ४ख्यिराड हम क्यानी देतुप ति मड ल्हक्पा गल्सिमा तेपा रम्बु च्युङ्नी ख्यिरा मिजीला काड साड ड्युङ्मु मेवी।

५दोजो ख्यिरा पर्ला ललाइला रिक्पा अला मेसुड सिसिन ड्रियर्मु माक्यानी सेम बोल्मु क्यानी नङ्गुप कोन्छ्योकला लोङ्शी, तमा खोकी तीला नङ्गितो। ६यिने खोला लोङ्गुप पेला सेमला तेपा क्यानी काड साड नाम्दोक माक्यानी लोड गोकिवी। सेमला नाम्दोक कितुपतिवा याड वुर्तुक कनिवा ग्युकिवे, तेवा राड ग्युकुप ग्येम्छोकी बालाप दोके यिन। ७तुका मी तीकी कोन्छ्योक नेमा काड ड्येकिवी सिनी नासाम मातोड। ८च्यिलासिसिन तुका मी ति सेम

नटे कोटे वोतुप तप्की तीकी काड क्यासिनाड चारा मुछुवी।

मी पेराङ्बु ताड छ्युकपुकी कोर्ला

९पेराङ्बु वोतुप अच्युनुपतिवा, कोन्छ्योककी ख्यिराडला चुक क्यानी छ्ये जोसुड सिनी ख्यिराड गा की। १०मी छ्युकपुतिवा, कोन्छ्योककी ख्यिराडला चुक क्यानी छ्युडा जोसुड सिनी गा की। च्यिलासिसिन छ्युकपु वोतुपतिवी मिजी ति चे मेन्दोक दोके रेर्पा डिवी। ११ड्रियमा छेन्दी शर्नी नाम्खर क्यासिमा च साड रेर्पा डिवी, मेन्दोक साड ड्रियल्लिवी, तमा तीकी थोङ्दाड ल्यामु साड तोर्किवी। ती दोके मी छ्युकपुतिवा साड तुकै राड यिन, चो लाका क्यानी नोर टोङ्बा शम्सिनाड ड्रियम्ज्यिक ती ना डिवी।

खोकपा ल्हापकी कोर्ला

१२चुका मी ति खोकपा ल्हापला ख्येलुप पेला छेटाड ख्येलसिनाड हम क्यानी दे थुप्किवे, ती मी ति मोलाम थोपुप यिनो। च्यिलासिसिन तीला मिजीकी उशाक थोप्कितो। ती छ्यक्तक ति कोन्छ्योककी खोला ड्रियङ्ज्येवु कितुपतिवाला तेरिन सिनी थाक्छ्येन नङ्गुप नाम्साड मिशिवु मिजी यिन। १३सी साड लाका मेलोवा कितुप नासाम वुङ्गुप पेला दी ति कोन्छ्योक नेमा वावु यिन सिनी नासाम मातोड, च्यिलासिसिन सी साड कोन्छ्योकला खोकपा

ल्हाप लाका कि मुथुपी, खोकी सुला साड खोक्पा माल्हावी १४ यिने मीतिवी सेमला नासाम दुक्टा शर्नी देर्पाला ख्येल्लिसमा खोक्पा ल्हापला ख्येल्लिवी। १५ तमा मी सेमला नासाम मेलोवा शर्नी तीकी दिक्पा किवी, दिक्पा मड टासिमा ती दिक्पाकी मीला ड्येलाला क्योल्लिवी।

१६ डे डियड्ज्येवु अच्युनुपतिवा, ख्यिराड मी यम्बी जिनोकला मेख्येल्ली। १७ ल्यामु वोतुप ताड काड साड ड्युड्मु मेतुप कटिनकी ड्येम्बातिवा तेरी पपा कोन्छ्योक नेमा गिवी। खोकी वोसिर तेरी ज्येनी नाड्सुड। खो ति नाम्साड मोफोवी, तमा उलाकी नक्तोमी फोवु दोके मोफोवी। १८ तमा खोकी ज्येवु च्यालकतिवी नाड्ला दाक्पु ति थल्माला गरुप डुप्सेन दोके जोपला खोकी टेड्बु वोतुप सुड नेमा खोकी नोवा नेसुर दाक्पुला जो नड्गुप यिन।

कोन्छ्योककी सुडला ड्येन्नी युकुपकी कोर्ला

१९ डे डियड्ज्येवु अच्युनुपतिवा, दी ताम्डे ति हाक्कोवा किसान। ख्यिराड टिम्बु क्यानी ड्येन्दुप ताड फिमु क्यानी ताम्डे लपुप ताड टिम्बु डियर्मु मिक्वि वुड गोकिवी। २० च्यिलासिसिन मी डियर्मुकी जोसालेन्सिन कोन्छ्योककी टेड्बुकी थोक्ला लाका कि मुथुपी। २१ तुक क्यानी तेरी लाका मेटेड्बु ताड दुक्टा कितुप क्युर। तमा कुसु

ज्यम्बु क्यानी ख्यिरा सेमला ज्युकुप कोन्छ्योककी सुडला मिजी क्योड। ती कोन्छ्योककी सुडगी राड ख्यिरा मिजी ति ज्होक थुप्किवी।

२२ ख्यिराड कोन्छ्योककी सुडला ड्येन्दुप तिराड क्यानी रडला जिनोकला मेख्येल्ली, यिने खोकी सुडला यु। २३ चुका मी तीकी सुड ड्येन्नी साड ती सुडला सुड्गुप दोके मिजी मोक्योड वे, ती मी ति गेलुड नाड्ला खोरो डुतुड ल्हाप मी दोके यिन। २४ तीकी खोरो डुतुड गेलुड नाड्ला ल्हासिमा शाक्येक डिवी, तमा खुरुड चुकै वे सिरुप ति टोक ज्येकिवी। २५ यिने चुका मी तीकी रड्ज्येन नड्गुप कोन्छ्योककी ठिम टेड्बुला ड्येन्नी नरी युक्पु ताड ती सुडला ड्याम किवे, ती मी ति सुड ड्येन्नी टोक ज्येतुप मिन, सुडला सिक्पावु दोके मिजी क्योड्गिवी। तमा कोन्छ्योककी सुडला युवु तप्की तीला मोलाम थोप्किवी।

२६ दोजो सी ड कोन्छ्योककी थोड्दाडला टेड्बु वे सिनी सिवी, यिने खोरो ख ति डेकला मोज्योकिवी सिसिन तीकी खोरो राड खुरुडला जिनोकला ख्येलुप यिन। तमा तीकी कोन्छ्योककी थोड्दाडला क्यावु टेड्बुकी लाका ति तेर्मे यिन। २७ पपा कोन्छ्योककी थोड्दाडला टेड्बु वोतुप ताड क्येन मेतुप किताड नालु ति तप्कुर ताड युक्सिमतिवाला कतुकारला ख्येलुप पेला ल्हटे कितुप

ताड दी जम्बुलिङकी दुक्टा नेसुर
खुरुङला राङ कुतुक ज्योकुप यिन।

मीला ख्ये बेतुप कोर्ला येन्देन

२ डे डियङ्ज्येवु अच्युनुपतिवा,
ख्यिराङ मोवा वोतुप दाक्पी
चोवो येशू ख्रीष्टला तेपा कितुप
मीतिवा यिन्दुप तप्की मी सुला साङ
ख्ये बेतुप लाका माकी। २दोजो मी
ललाइ सेरकी सोर्तुकतिवा तानी मज्या
ल्यामु कोन्नी ख्यिराङ जोम्बुप दासाला
वासुङ, तमा यम्बा मी पेराङ्बु यी
साङ मज्या सेर्पा कोन्नी तेराङ वासुङ
सिसिन, ३ती मज्या ल्यामु कोन्दुप
मी तीला ताङ्देन क्यानी “दे दासा
ल्यामुला जोल्हमो क्यानी ज्यु!” सिनी
सिवी, यिने ती मी पेराङ्बु मज्या सेर्पा
कोन्नी वावु तीला ति “ख्युरुङ ते राङ
लानी दे, याङ्ना डे काङ्बी चाला दे!”
सिनी सिवी सिसिन, ४ख्यिराङ मीला
ख्ये बेतुप ताङ सेम मेलोकपा क्यानी
मीला ठिम कितुप मीतिवा यिन।

५तुक क्यानी डे डियङ्ज्येवु
अच्युनुपतिवा, दी ताम्डे ड्येना।
जम्बुलिङला वोतुप पेराङ्बुतिवाला
कोन्छ्योककी पेनी तिवी क्यावु
तेपाला छ्युकुपु जोनी खोला डियङ्ज्ये
कितुपतिवाला तेरिन सिनी खोकी
थाक्छ्येन नङ्गुप ग्येल्खापला दे
छ्योवु जो मनङ्गिगवी रो? ६यिने
ख्यिरा याङ पेराङ्बुतिवाला डियङ्मर

क्यासुङ। काङ मी छ्युकुपुतिवी
ख्यिराङला ओङ्ज्येन क्यानी दुक्पा
मेतेर्वी रो? काङ तिवी ख्यिराङला
ठिम्खाङला टिनी मोक्खोल्वी रो?
७काङ तिवी ख्यिरा तेपा क्यावु चोवो
येशू ख्रीष्टला साङ मारे तङ्गुप मिन
रो? ८कोन्छ्योककी सुङला साङ
“खोरो युल्वातिवाला रङला दोके
डियङ्ज्ये की।”* सिनी टि वे। वुतुङ
के ख्यिरा ती कोन्छ्योककी सुङला
वोतुप खक्छ्येवु कला ड्येन्सुङ
सिसिन ख्यिरा ल्यामु राङ क्यावु
यिन। ९यिने ख्यिरा मीला ख्ये बेतुप
लाका क्यासुङ सिसिन ख्यिराङ
कोन्छ्योककी नङ्गुप ठिमला
मेङ्येन्दुप ताङ दिक्पा क्यावु यिन।
१०ललाइ मीतिवी कोन्छ्योककी
नङ्गुप ठिमला सिक्पावु दोके तेरी
किवी, यिने ती ठिमकी नाङ्ला
वोतुप ताम्डे च्यिक ति मेङ्येन्दिवी
सिसिन तीकी ती ठिम तेरी माङ्येन्दुप
यिन। ११च्यिलासिसिन “शम्डेन
माकी।” सिरुप च्यिक राङ वोतुप
कोन्छ्योककी “मी मासे।” सिनी साङ
सुङ वे। दोजो मी च्यिककी शम्डेन ति
मिकिवी, यिने मी सेकिवी सिसिन,
ती मी तीकी कोन्छ्योककी नङ्गुप
ठिमला मातेन्दुप यिन। १२ख्यिराङला
रङ्ज्येन नङ्गुप कोन्छ्योककी
ठिमला सुङ्गुप दोके ख्यिरा ताम्डे
लप्ताङ ताङ किताङ नालु ल्यामु की।

मिसियाड ती ठिमकी ख्यिराडला पचर्या तोड्गिगी। ^{१३}च्यिलासिसिन कोन्छ्योककी ठिम क्या नड्गुप पेला मीला च्यम्बा मिकिवु तीला खोकी साड च्यम्बा माक्यानी ठिम क्या नड्गिगी, यिने च्यम्बा क्यावु मी ति खोकी ठिम कितुप पेला ग्येलिगी।

लाका मेतुप तेपा ति फेन मोथोवु यिन

^{१४}डे डियड्ज्येवु अच्युनुपतिवा, दोजो मी ललाइकी “ड येशूला तेपा किवी।” सिनी सिवी, यिने तेपा क्यावु दोके लाका ति मिकिवी सिसिन, तीला काड ख्येप्साड गिगी रो? काड तीकी क्यावु तेपाकी तीला ज्होक थुक्किवी रो? ^{१५}दोजो ललाइ नुप रे नुम रे मज्या सेर्पा कोन्दुप वे, तमा तिवाला डियमी टेडकी साप समा साड मलाड्गुप वे सिसिन, ^{१६}ख्यिरा पर्ला ललाइकी तीला “लोदिमु क्यानी ग्युक, मज्या टेन्बु कोन्नी दे, तमा डाता सेक क्यानी समा सो।” सिनी सिवी, यिने तीला गोवु च्यालकतिवा मेतेर्वी सिसिन तीला काड ख्येप्साड वे रो? ^{१७}ती दोके येशूला तेपा क्यासिमा साड तेपा क्यावु दोके लाका ति मिकिवी सिसिन, ती तेपा ति काड साड फेन मोथोवु डिवी।

^{१८}यिने दोजो मी ललाइकी “ख्युरुडला तेपा वे, डला ति किताड नालु ल्यामु वे। ख्योरो किताड नालु मेतुप तेपा ति डला छ्या तेन! तमा

डे क्यावु किताड नालु नेमा डे तेपा ति ख्युरुडला छ्या देनिन।” सिनी सिवी। ^{१९}कोन्छ्योक च्यिक राड वे सिनी ख्यिरा सिवी, ती ताम्डे ति ल्यामु यिन। डेतिवी साड तुकै राड सिवी, यिने तिवा ज्यिवा लानी ज्हुकिवी। ^{२०}ओ अम्बारडिशडतिवा, लाका मेतुप तेपा ति तेर्मे यिन सिरुप ति ख्यिराड हाक्कोवु नोकिवी? ^{२१}दाक्पी हड्गावा अब्राहामकी खोरो पुज्युड इसहाक ति कोन्छ्योककी थोक्ला जिन्बा पुल्सिमा ती ति खोकी थोड्दाडला टेड्बु च्युड्गुप मिन रो? ^{२२}ख्युरुडला छ्या वे, अब्राहामकी तेपा तिराड क्यानी मिन, यिने तेपा क्यावु दोके लाका साड क्यावु तप्की तीकी तेपा क्यावु ति टेड्बु च्युड्सुड। ^{२३}कोन्छ्योककी सुडला “अब्राहामकी कोन्छ्योकला तेपा क्यावु तप्की खोकी अब्राहामला टेड्बु वोतुप यिन सिनी चिसुड।” सिनी टि वोतुप सुड ति तेरी छेसुड। तमा मीतिवी अब्राहाम ति कोन्छ्योककी दाल्जा यिनोक सिनी सिक्कासुड। ^{२४}तुक क्यानी ख्यिरा हाक्कोकिवी, तेपा तिराड क्यानी मिन, यिने तेपा क्यावु दोके लाका क्यासिमा तिराड मी ति कोन्छ्योककी थोड्दाडला टेड्बु च्युड्गिगी। ^{२५}पुम्पेजा छ्येमु राहाबकी साड च च्येतुपला तड्गुप इस्राएलकी मीतिवाला गासो शुनी पिशोर च्यितुप तप्की तीकी क्यावु लाका नेमा राड ती ति कोन्छ्योककी

थोङ्दाडला टेङ्बु च्युङ्गुप मिन रो?
 २६तुक क्यानी उ मेतुप जु ती शेप दोके,
 लाका मेतुप तेपा साङ शेप यिन।

रङ्गी ख डेकला ज्योकुप कोर्ला

३ डे ड्रियङ्ज्येवु अच्युनुपतिवा,
 ख्यिरा पर्ला माङ्शोक गेकेन
 च्युङ्गुप नो माकी, च्यिलासिसिन येन्देन
 तेरुप गेकेनतिवाला कोन्छ्योककी मङ
 छासे क्यानी पर्च्या तोङ्गिगी। २दाक्पु
 तेरीकी च्यिक मे च्यिक याङ मेलोवा
 क्यावु राङ गिवी। चुका मी तीकी
 खोरो ख डेकला ज्योकिवे, तीकी
 खोरो जुला साङ डेकला ज्योकिवी।
 तमा ती ति मी टेङ्बु च्युङ्गिगी।
 ३ततिवाला ओङला ज्योकुपला
 खला खम्देर ग्यप्सिन, कनिवा डोयी
 दे लङ्गिगे, तेवा राङ टिनी डो
 थुप्किवी। ४टुतिवाला ल्हो, तिवा
 वुर्तुक ग्येर्पु ग्यप्सिनाङ टु फार ताङ
 छुर क्योकुप पतवार टिक्पे यी थ्वोनी
 टु ग्येर्पु तोङ्गुप मी तीकी कनिवा
 ताङ्नी डोयी दे लङ्गिगे, तेवा राङ
 डिवी। ५ती दोके दाक्पी च्येलाक
 साङ टिक्पे यिन्सिनाङ अम्बारङ्गिङ्ग
 कितुप ताम्डे ग्येर्पु ग्येर्पु थेन्गिगी।

मे मेवुर टिक्पे यीकी साङ नाठुङ
 ग्येर्पु ग्येर्पुतिवा पुसुकी जेवी। ६दाक्पी
 च्येलाक साङ मे दोके यिन। ती ति
 जुला वोतुप येन्लकतिवी नाङ्ला
 दिक्पा कि ज्यितुप दुक्टा दोके राङ
 यिन। दीकी जोसालेन्सिन दाक्पी
 तेरी मिजीला मेलोवा जेवी, तमा तेरी

मिजी ति ड्येलाकी नाम्साङ मिशिवु मे
 नाङ्ला क्योल्लिगी।

७नम्बा तेरीकी सेम्ज्येन ताङ च्यच्युम
 ताङ जु टिनी युक्पुप सेम्ज्येन ताङ
 ग्येम्छोकी सेम्ज्येनतिवा ति मीतिवी
 दुल्लिगी, ८यिने दाक्पी च्येलाकला
 सी साङ डेकला ज्योक मुथुपी। दीकी
 नरी ताम्डे मेलोवा तिराङ क्यावु
 ति क्यातोक किवी। तमा दीकी
 दाक्पुला तुक् सोवु दोके क्यानी
 ड्येलाकला क्यल्नी शि ज्यिकिवी। ९दी
 दाक्पी च्येलाककी राङ दाक्पी पपा
 कोन्छ्योकला सोवा साङ देकिवी,
 खोकी जुजमला जो नङ्गुप मीतिवाला
 मोताप साङ देप्किवी। १०दाक्पी ख
 च्यिक नेमा राङ मीला मोलाम साङ
 थोप्किवी, मोताप साङ देप्किवी। डे
 ड्रियङ्ज्येवु अच्युनुपतिवा, ख्यिराङ
 ति तुक् कितुप मेङ्गिगी। ११काङ
 छ्यु दोलुप छ्यी पुङ च्यिक नेमा छ्यु
 शिम्बु ताङ छ्यु खक्ती थेन्गिगी रो?
 १२डे ड्रियङ्ज्येवु अच्युनुपतिवा, काङ
 अन्जीरकी दोङ्बुला जैतुन, याङ्ना
 गुन्डुम दोङ्बुला अन्जीर गोर्किवी
 रो?। ती दोके क्यानी छ्यु छेतोक
 दोलुप छ्यी पुङ नेमा छ्यु शिम्बु थेन
 मुथुपी।

कोन्छ्योककी नङ्गुप रिक्पाकी कोर्ला

१३ख्यिरा पर्ला रिक्पा ताङ येन्देन
 वोतुप मी सु वे? तीकी खोरो किताङ
 नालु ल्यामु नेसुर खुरुङला वोतुप

रिक्पा ताड येन्देन छ्या तेन। ती किताड नालु ति कुसु ज्यम्बु ताड रिक्पा नेसुर वुड गोकिवी। ^{१४}यिने दोजो ख्यिरा सेमला ठतोक कितुप ताड खुरुडला तिराड नासाम तोडिगवी सिसिन, छासे रिक्पा वे सिनी तुका ताम्डेला हम्बा माकी, यिने ताम्डे टेड्बु तिराड की। ^{१५}च्यिलासिसिन तुका परकी रिक्पा ति कोन्छ्योक नेमा वावु रिक्पा मिन, दी जम्बुलिड ताड मी नासाम मेलोकपा नेसुर ताड डेकी ओड नेमा वावु रिक्पा यिन। ^{१६}कनी ठतोक कितुप ताड खुरुडला तिराड च्युडशी सिरुप सेम नोके, ते खाँदा शोरुप ताड तेरी परकी लाका दुक्टातिवा गिवी। ^{१७}यिने देवाच्येन नेमा वावु रिक्पा ति गोमाला टेड्बु वोतुप ताड तिड्ला लोदिमु वोतुप ताड सेम बोल्मु ताड मी यम्बी सिक्यावु ताम्डेला ड्येन्दुप ताड च्यम्बा वोतुप ताड डेलु ल्यामु गरुप दोड्बु दोके मिजी ल्यामु क्योड्गुप गिवी। यम्बा देवाच्येन नेमा वावु रिक्पा ति ललाइला ल्यामु ललाइला मेलोवा मिकिवु ताड खोनक्पा मेतुप गिवी। ^{१८}तमा नरी मीतिवाला डिड तेरुप छोलुप मीतिवाला ज्युक्ला कोन्छ्योककी थोड्दाडला टेड्बु वोतुप च्युडिगवी।

कोन्छ्योकला खोरो मिजी पुलुप

४ ख्यिरा पर्ला कडगी तेन्दोकला खाँदा ताड थमु शोर्किवी? ती

ति ख्यिरा पर्ला रडगी थोक्ला तिराड च्युडशी सिनी सेमला थमु ग्यकुप नासाम नरी वोतुप तप्की यिन। ^२ख्यिराड ख्यिरा सेमला नो क्यावु च्यालकतिवा थोप्शी सिरुप याड नो किवी, यिने मेड्येवी। ख्यिराड ख्यिरा नो क्यावु च्यालकतिवा थोपुपला मी सेतुप ताड देर्पा क्यासिनाड, खाँदा ताड थमु ग्यप्सिनाड ख्यिराडला काड साड मेड्येवी। च्यिलासिसिन ख्यिराड कोन्छ्योकला मोलोडिगवी। ^३ख्यिरा कोन्छ्योकला लोड्गुप याड लोडिगवी, यिने मेड्येवी। च्यिलासिसिन ख्यिराड खोरुडला तिराड गा ताड किर्मु जोप नासाम मेलोवा ताडनी लोडिगवी। ^४ओ शम्डेन कितुप टेड, कोन्छ्योकला तेपा क्यानी साड जम्बुलिडला गा कितुप ति कोन्छ्योक ताड मुला डला गलुप यिन सिरुप ति ख्यिराडला छ्या मे? सु दी जम्बुलिडला गा किवे, ती ति कोन्छ्योक ताड मुला डला गलुप यिन। ^५कोन्छ्योककी दाक्पुला नड्गुप थु चाड्माकी दाक्पुला छासे गा लानी ड्यिड्ज्ये किवी सिनी कोन्छ्योककी सुडला टिवु ति तेमें यिन सिनी ख्यिराड नासाम तोडिगवी? ^६यिने खोकी दाक्पुला छासेकी कटिन नडिगवी। ती तप्की कोन्छ्योककी सुडला दुक् सिनी टि वे,

“अम्बारडिशड कितुपतिवाला कोन्छ्योक गा मालडिगवी,

यिने सेम बोल्मु वोतुपतिवाला
कटिन नडिगवी।”*

७तुक क्यानी रडगी मिजी ति
कोन्छ्योककी ओडला ज्योक, तमा
शैतानकी तेन्दोकला लो। तुक क्यासिन
ती शैतान ति ख्यिरा नेसुर टोनी डिवी।
८तमा ख्यिराड कोन्छ्योककी चिप्ला
ग्युक, तुक क्यासिन खो ख्यिरा चिप्ला
फेक्किवी। ओ दिक्छेनतिवा, ख्यिराड
दिक्पा कितुप क्युर। ओ सेम नटेकोटे
वोतुप टेड, ख्यिराड सेम टेड्बु क्यानी
यु। ९ख्यिरा क्यावु दिक्पाकी थोक्ला
पप की, तमा दुडल क्यानी डु।
ख्यिराड गोटे कितुप क्युर ज्याक्नी
पप की। लोदिमु कितुप क्युर ज्याक्नी
दुडल की। १०ख्युरुड कोन्छ्योककी
थोड्दाडला कुसु ज्यम्बु क्यानी मिजी
क्योड, तमा खोकी ख्युरुडला छ्ये जो
नडिगवी।

च्यिककी च्यिकला क्येन मातेर

११ओ अच्युनपतिवा, ख्यिराड च्यिक
ताड च्यिककी तेन्दोकला ताम्डे
मेलोवा माकी। सी खोरो नुपकी
तेन्दोकला ताम्डे मेलोवा क्यानी
क्येन तेर्किवे, तीकी कोन्छ्योककी
नङ्गुप ठिमकी तेन्दोकला ताम्डे
मेलोवा कितुप ताड क्येन तेरुप
यिन। ख्यिरा ठिमकी तेन्दोकला
क्येन बिन्सिन कोन्छ्योककी ठिमला
सुङ्गुप दोके मिजी क्योङ्गुप मिन,

ठिमकी तेन्दोकला क्येन बिन्दुप
यिन। १२ठिम नङ्गुप ताड ठिम
कितुप ति मिरा च्यिक राड वे।
खोकी ज्होकुप साड थुक्किवी, ना
साड तोड थुक्किवी। तुक क्यानी
रडगी युल्वातिवाला क्येन तेरुप ति
ख्युरुड सु यिन?

सला काड कितुप ना काड कितुप सिरुप कोर्ला

१३ख्यिराड दी ताम्डे ति इयेना,
“हारिड याङ्ना सला दाक्पु ग्येसा
यीला गल्नी लो खोर्मा यी देनी छोड
क्यानी टोड्बा शोम्बुप्नो” सिनी
सिरुप मीतिवा! १४यिने ख्यिरा
मिजीला सला काड ख्येल्लिगी सिरुप
ति ख्यिराडला छ्या मे। ख्यिरा मिजी
याड काड यिन रो? ख्यिरा मिजी याड
उकुर च्यिक मिक्की थोङ्गुप ताड
तोक तोर्नी डोप मुसिल दोके यिन।
१५ख्यिरा तुक सिरुप छोलेयाड बोरु
“कोन्छ्योककी नोवा वोसिन, दाक्पु
सेन्बु देनी दुकै कितुप तुकै कितुप।”
सिनी सि गोकिवी। १६यिने तन्दा
ख्यिराड रडगी मिजीकी थोक्ला नो
क्यावु ताम्डेला छासे तेके किवी।
तुका लाका ति दुक्टा यिन। १७ती
तप्की चुका मी तीकी लाका ल्यामु
कि गोकिवी सिरुप छ्या वोसिनाड
मिक्की सिंसिन, तीकी दिक्पा
क्यावु यिन।

मी छ्युकपुतिवाला टोङ्गु

५ मी छ्युकपुतिवा, दी ताम्डे ति ड्येना, ख्यिराडला ख्येल वुङ्गुप छेटाडतिवा नासाम तङ्नी डु। तमा छासे डुप्राड की। ^२ख्यिलासिसिन ख्यिरा टोङ्बा ति च्यम सिन वे, ख्यिरा कोन्दुप मज्यातिवाला मुक्पा ग्यप्नी वे। ^३ख्यिरा सेर ताड डुलला या छ्यान वे, तमा ती या ति ख्यिरा थोकला पङ्बु डिवी। तीकी ख्यिरा जु ति मे छिकुप दोके कयानी ना तोङ्गितो। च्यिलासिसिन ख्यिराड जम्बुलिङ ना डोप तुजे वुङ्गुप छल्सिनाड रङ्गी थोकला टोङ्बा सकुप लाका तिराड क्यासुड। ^४लहोसा, ख्यिरा रङ्गी शिङ खला लाका कितुपतिवाला तेर गोवु लतिवा माबिन वे। ती तप्की तिवा ख्योरो तेन्दोकला डुप्राड कियी वे। तिवी डुप्राड क्यावु ति ओड छ्येन्बु कोन्छ्योककी सेन्नी वे। ^५ख्यिराड दी जम्बुलिङला गा ताड किर्मु कयानी किकी तोङ्गियन सिरा मिजी क्योङ्गियन वे। तुक कयानी ख्यिराड सेतुप पेला लेप्सिनाड खोरो मिजी तिराड नासाम तङ्नी ग्यामु जो ज्याक्नी वे। ^६ख्यिरा काड साड क्येन मेतुप मीतिवाला क्येन बिन्नी तिवाला सेसुड, यिने तिवी ख्यिराडला लाक्पा मालोक।

छेटाडला हम कयानी देतुप

^७ती तप्की अच्युनुपतिवा, ख्यिराड ति चोवो येशू फेवु तुजे माछेवा सेक्ला

हम कयानी दे। लहोसा, सप्पे कितुप मीकी सशिङकी गोड नावु डुप्सेनला ल्येशी नोनी येर्वी छ्यर्वा ग्यक्ता सेक ताड गुन्बी छ्यर्वा ग्यक्ता सेक हम कयानी गु देकिवी। ^८ती दोके कयानी ख्यिराड सेम थिला ज्याक्नी चोवो फेवु तुजेकी थोकला हम कयानी गुनी देता, च्यिलासिसिन चोवो डमु राड फेप्कितो। ^९ती तप्की अच्युनुपतिवा, ख्यिराड च्यिककी च्यिकला ड्योशोक ड्योशोक मासिर। मिसियाड ख्यिराड कोन्छ्योककी पच्याला ख्येलितो। लहोसा, ख्यिराडला ठिम कितुप चोवो ति गे चाला राड वोतो।

^{१०}अच्युनुपतिवा, कोन्छ्योककी मिङला नम्दर शेतुप लुङ्तेम्बातिवाला लहो। तिवा चुक कयानी छेटाड खुरुप ताड हम कयान देतुप ति नासाम ताङ्नी ख्यिराड साड तिवी दोके कयानी लुमु से। ^{११}लहोसा, हम क्या देतुपतिवा मोलाम वोतुप यिनो। अय्यूबकी चुक कयानी हम कयानी देसुड, तमा तिङ्ला कोन्छ्योककी तीला मोलाम नाङ्सुड सिरुप ताम्डे साड ख्यिरा हाक्को वे। तमा चोवो कोन्छ्योक ति ड्यिङ्ज्ये ताड च्यम्बा नङ्गुप यिन सिरुप साड हाक्को वे।

^{१२}अच्युनुपतिवा, खक्छ्येवु ताम्डे ति काड यिन सिसिन, ख्यिरा पर्ला ताम्डे थाक्छ्येतुप पेला नाम्साड न माक्योल। देवाच्येन ताड जम्बुलिङकी थोकला याङ्ना चुका च्यालककी थोकला साड न माक्योल। चुका ताम्डे

साड यिन्सिन यिन सी, मिन्सिन मिन सी। तुक क्यासिन कोन्छ्योककी ख्यिराडला पचर्या मोतोङ्गिगी।

तेपा क्यानी मोपोर कितुप कोर्ला

१३ख्यिरा पर्ला ललाइकी छेटाड खुरिन वोसिन तीकी कोन्छ्योकला मोपोर किशी। ललाइला सेम गा लान वोसिन तीकी कोन्छ्योकला सोवा देकुप लुतिवा लङ्शी। १४ख्यिरा पर्ला ललाइ नेर्पु वोसिन तीकी चर्चला गोमा कितुप मी छ्येतिवाला कताङ्नी चोवो येशूकी मिङला नुम्शाल ग्यप्नी तीकी थोकला मोपोर किशी। १५तेपा क्यानी मोपोर क्यासिन नेर्पु टेकिवी, तमा कोन्छ्योककी ती नेर्पुला येर लोङ्गिगी। तीकी दिक्पा क्या वोसिनाड तीकी क्यावु दिक्पा ति माफ ड्येकिवी। १६ती तप्की ख्यिराड च्यिककी च्यिकला डे दिक्पा क्यावु यिन सिनी सेम ग्युर, तमा च्यिककी च्यिकला मोपोर की। तुक क्यासिन चोवोकी ख्यिराडला

टेक ज्यिकिवी। च्यिलासिसिन कोन्छ्योककी थोङ्दाडला टेङ्बु वोतुप मीतिवी क्यावु मोपोर ति डार छ्येवु गिगी। १७कोन्छ्योककी लुङ्तेम्बा एलिया साड दाक्पु दोके किताड नालु वोतुप मी राड यिन, यिने तीकी छ्यर्वा मग्यक्शी सिनी कोन्छ्योकला मोपोर क्यासुड, तमा लो सुम ताड ल टुक सेक जम्बुलिङला छ्यर्वा छ्येसुड। १८येलुङ तीकी छ्यर्वा ग्यक्शी सिनी कोन्छ्योकला मोपोर क्यासुड, तमा छ्यर्वा ग्यप्नी सशिङ खला छासे सप्ले ल्यासुड।

१९अच्युनुपतिवा, ख्यिरा पर्ला ललाइकी कोन्छ्योककी सुडला युकुप क्युर्नी ज्याक्सिन तीला येलुङ लोकनी टि शोक। २०दी ताम्डे ति हाक्कोवा की, दोजो ललाइकी दिक्छेन मिरा च्यिकला लाम मेटेङ्बुला युकुप नेसुर लोकनी टि वासुड सिसिन, ती दिक्छेन तीला शेष ने ज्होकिवी, तमा तीकी क्यावु दिक्पातिवा साड माफ ड्येकिवी।

